

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. पहलगाम आतंकी हमले दे बाद आतंकवाद खलाफ चलाए गेदे “आपेशन सिंदूर” बारें जानकारी देने लेई बनाए गेदे 7 शिष्टमंडलें दा पहला दल अज्ज 4 देशें दे दौरें पर रवाना होआ’रदा ऐ।
2. पाकिस्तानी सेना नै अपने मुल्खै च अपने लोकें सामने गै अपनी साख मुहाई दिती ऐ। आपेशन सिंदूर अजें खत्म नेई होआ ऐ। कुसै बी चुनौती दा परता देने लेई सकना पूरी चाल्ली तैयार ऐ, आखेआ पुंछ ब्रिगेड प्रमुख होरें।
3. खेड्ड मंत्री सतीश शर्मा होरें कैपेक्स योजना दा जायजा लैता। खेड्ड मैहकमे तैहत चलाए जा’रदे विकास जत्नें दी अमलावरी दा निरीक्षण कीता। उनें परियोजनाएं गी तौले पूरा करने ते युवाएं दी शमूलियत बदाने पर जोर पाया।
4. मुख सचिव होरें औंदे सालाना खीर भवानी मेले दी तैयारिं दा जायजा लैता। दौनें खितें दे डिविजनल कमिशनरें गी इंतजाम पूरे करने लेई आखेआ।
5. जम्मू-कश्मीर हज कमेटी नै हज श्रद्धालुएं आस्तै डोआरिं सरबन्धी जानकारी परतिए नमें सिरेआ अधिसूचित कीती।

<><><><><><>

First-Delegation

पहलगाम आतंकी हमले मगरा आतंकवाद दे खिलाफ आपेशन सिंदूर उप्पर भारत दे राजनयिक कुल संसारी संपर्क लेई गठित 7 सर्वदलीय शिष्टमंडल शा पैहला शिष्टमंडल अज्ज 4 मुल्खें लेई रवाना होआ’रदा ऐ। शिवसेना दे सांसद श्रीकांत शिंदे हुंदे नेतृत्व च एह प्रतिनिधिमंडल संयुक्त अरब अमीरात, लाइबेरिया, कांगो ते सियरा-लियोन जाग। जनता दल यूनाइटेड दे सांसद संजय झा ते डएमके पार्टी सांसद कनिमाझी करुणानिधि हुंदे नेतृत्व च दो प्रतिनिधिमंडल कल इंडोनेशिया, मलेशिया, कोरिया, जपान, सिंगापुर ते स्पेन, यूनान, स्लोवेनिया, लातविया ते रूस लेई रवाना होडन। एह बहुदलीय प्रतिनिधिमंडल आतंकवाद गी कदें बी बर्दाश्त नेई करने दी भारत दी नीति तैहत एहदे शा निब्बड़ने दी राश्ट्री प्रतिबद्धता ते पक्के निश्चे गी दुनिया दे सामने

रक्खोग। विदेश सचिव विक्रम मिसरी होरें कल नमीं दिल्ली च संसद भवन च इनें त्रौनें शिष्टमंडलें दे सदस्यें गी भारत दे कूटनीतिक नजरिये दी जानकारी दिती। बैठक मगरा मीडिया कन्न्ने गल्ल करदे होई श्रीकांत शिंदे होरें गलाया।

<><><><><><>

Poonch-Brigade

पुंछ ब्रिगेड दे कमांडर ब्रिगेडियर मुदित महाजन होरें आखेआ ऐ जे ऑप्रेसन सिंदूर अजें स्थगित कीता गेआ ऐ ते जेकर परतियै चुनौती दिती जंदी ऐ ते सेना एहदा बनकदा परता देने लेई पूरी चाल्ली तैयार ऐ। पुंछ च इक प्रेस कांफ्रेंस करदे होई ब्रिगेडियर होरें आखेआ जे पाकिस्तान नै अपनी साख मोहाई दिती दी ऐ ते पुंछ ब्रिगेड नै आतंकवाद दे बुनियादी ढांचे उप्पर सटीक प्रहार कीता ऐ। इस मौके पर बोलदे होई उनें आखेआ।

Op. Sindoer

समूलचा मुख्य इनें दिनें आप्रेशन सिंदूर दी कामयाबी दा जशन मना करदा ऐ जेदे तैहत पाकिस्तान ते पाकिस्तान दे नजैज कब्जे आहले जम्मू-कश्मीर च आतंकवादिऐं दे 9 ठकानें ते सिखलाई कैपें गी तबाह करी दिता गेआ हा ते 100 कोला मते खतरनाक आतंकवादिऐं दा सफाया करी दिता हा। इस ऑप्रेशन नै पाकिस्तान दा सच पूरी दुनिया दे सामने आहिनए रक्खी दिता ऐ। मारे गेदे आतंकवादिऐं दे जनाजे च पाकिस्तानी सेना दे कई बड्डे अधिकारी शामिल होए। आतंकवाद गी दना बी नेई बर्दाश्त करने दी अपनी नीति तैहत ऑप्रेशन सिंदूर राऐं कार्रवाई करिए भारत नै सख्त ते साफ स्नेहा दिता। इस कामयाबी दा जशन मनाने लेई जित्थे तरंगा रैलियां कड्डियां जा'रदियां न, उत्थे गै समाज दे बक्ख-बक्ख वर्गें दे लोक बी भारतीय फौज दी इस कामयाब ऐतिहासिक कार्रवाई गी सराहना करदे न। इस बारै आकाशवाणी जम्मू कन्नै गल्ल करदे होई मेजर जनरल रिटायर्ड गोवर्धन सिंह जम्वाल होरें आखेआ।

Tiranga-Yatra

ऑप्रेशन सिंदूर दी सफलता ते सशस्त्र बलें दी दलेरी गी सम्मानित करने आस्तै रामबन जिले दी बनिहाल थाहर इक व्यापक तिरंगा जातरा कड़्डी गई। इस जातरा च मकामी लोकें, युवाएं ते समुदायिक नेताएं पूरे उत्साह कन्नै हिस्सा लैता। इनें लोकें रैली दौरान देशभक्ति दे नारे बी लाए। ऑप्रेशन सिंदूर तैहत कीती गेदी सेना दी कार्रवाई गी लोकें अपना पूरा समर्थन दिता ते आतंकवाद खलाफ लड़ाई च इकजुटता जाहिर कीती। अपने विचार सांझा करदे होई लोकें आखेआ।

<><><><><><>

Satish-Sports

युवा सेवाएं ते खेड्ढ मंत्री सतीश शर्मा होरें मैहकमे दी 2025-26 कैपेक्स योजना बारें समीक्षा बैठक दी अध्यक्षता कीती ते अफसरें गी खेड्ढे दी पहलकदमियें गी लागू करने च तेजी आहनने लेई आखेआ। खेड्ढ परिसरें, खेड्ढे दे मैदानें च सुधार ते सिखलाई शिविरें जनेई परियोजनाएं गी समेंसिर पूरा करने उप्पर जोर दिंदे होई उनें युवाएं दे विकास च खेड्ढे दी भूमिका उप्पर जोर दिता। मंत्री होरें राश्ट्री युवा कोर दे स्वयंसेवकें लेई बेहतर मेहनत भत्ता ते मैहकमे दे अंदर तालमेल गी होर मजबूत करने लेई बी आखेआ। मंत्री होरें शांति ते विकास सरबन्धी पहलकदमियें दे तैहत ग्राएं बन्ने आहले इलाकें ते दूर-दरेडे इलाकें दी परियोजनाएं दी बी समीक्षा कीती जेदा मकसद युवाएं दी भलाई-बेहतरी ते आत्मविश्वास गी बढ़ावा देना ऐ।

<><><><><><>

CS-Kheer Bhawani

मुख्य सचिव अटल डुल्लू हुंदी अध्यक्षता च इक उच्च स्तरीय बैठक लाई गई जेदे च 3 जून गी गांदरबल दे तुलमुला च होने आहले सालाना खीर भवानी मेले दी तैयारियें दी समीखा कीती गई। उनें दौनें खितें दे डिविजनल कमिशनरें गी निर्देश दिता जे ओह परिवहन, बिजली, रौहने-बौहने दी बवस्था, पानी, साफ-सफाई, चिकित्सा ते सुरक्षा सरबन्धी प्रबंधें गी यकीनी बनान। डुल्लू होरें सुचारू ते सुरक्षित तीर्थ यात्रा लेई मैहकमे बश्कार स्हेई तालमेल उप्पर जोर दिता। पुलस नै शांतिपूर्ण संचालन लेई सख्त सुरक्षा दी बी पुष्टि कीती ऐ। इस सालाना मेले च बड़ी मती गिनतरी च लोकें दे औने दी मेद ऐ।

<><><><><><>

Hajj-Flights

जम्मू-कश्मीर हज कमेटी नै हज यात्रियें लेई डोआरियें दी सूची परतियै नमें सिरेआ जारी कीती ऐ। मुख्य मंत्री उमर अब्दुल्ला होरें जम्मू-कश्मीर सरकार दे आग्रह दा तेजी कन्नै परता दिंदे होई हज यात्रियें आस्तै डोआरियें च बाददा करने लेई अल्पसंख्यक मामलें ते नागरिक उड्डयन मंत्रालयें दा आभार जताया। मुख्यमंत्री होरें आखेआ जे इस गैंs कन्नै एह यकीनी बनाया जाग जे 1 ज्हार 885 तीर्थयात्री जेड़े पैहले घट्ट डोआरियें दे होने करी हज दी यात्रा नेई करी सकदे हे ओह हून सुचारू ढंग्गै कन्नै करी सकंगन। नमीं सूची मताबक डोआरिएं गी 25 मई 2025

थमां परतियै शुरू कीता जाग। पूरी सूची आकाशवाणी न्यूज जम्मू दे टिवटर हैंडल उप्पर उपलब्ध ऐ।

<><><><><><>

Property-Attach

उधमपुर पुलस नै इक बड्डी कार्रवाई तैहत नशा तस्कर मोहम्मद आसिफ जेड़ा उधमपुर दे रैहम्बल दा रौहने आहला ऐ, ओहदी 1 करोड़ 50 लक्ख रपे दी संपत्ति गी जब्त कीता ऐ। उधमपुर दे एसएसपी अमोद अशोक नागपुरी होरें आखेआ जे लोड़चदी कार्रवाई कीती जाऱदी ऐ। खिते थमां नशीले पदार्थे कन्नै जुड़े दे ढांचे गी खत्म करने लेई एह कार्रवाई कीती गई ऐ। होर जानकारी दिंदे होई एसएसपी होरें आखेआ।

<><><><><><>